

दिनांक 07.04.2025  
समय: 18.45 बजे  
आकाशवाणी जयपुर-अजमेर

### प्रादेशिक समाचार

- मुख्यमंत्री भजनलाल शर्मा निरामय राजस्थान अभियान समेत स्वास्थ्य ऊं जुड़ी केई योजनावां री सरुआत कीनी।
- राष्ट्रीय पोषण पखवाड़ो काल सरु व्हेला-बच्चां अर महिलावां मांय पोषण जागरुकता बधावण सारु प्रदेश मांय ई जरूरी तैयारियां।
- प्रधानमंत्री मुद्रा योजना रा तहत लारला दस साल मांय 52 करोड़ ऊं बत्ता लोगां ने 32 लाख करोड़ रुपया ऊं बत्ती रकम रा कर्ज मंजूर करी ज्या।
- प्रदेश मांय केई ठौड़ां जबरदस्त गर्मी ।

विश्व स्वास्थ्य दिवस रे मौके प्रदेश मांय आज निरामय राजस्थान अभियान सरु करी ज्यो। जयपुर मांय राखी ज्या राज्य स्तर रा कार्यक्रम मांय मुख्यमंत्री भजनलाल शर्मा इण री सरुआत कीनी। श्री शर्मा ई सागे ई विकास रा पूरा व्हा 26 करोड़ रुपया ऊं बत्ता खर्च वाळा काम जनता ने संप्या। वे 24 मोबाइल मेडिकल यूनिट अर 10 एडवांस लाइफ सपोर्ट एम्बूलेंस ने ई रवाना कीनी। कार्यक्रम मांय आयुष्मान आदर्श ग्राम पंचायत योजना, मिशन मधुहारी, मिशन लिवर स्माइल अर ईट राइट राजस्थान अभियान री ई सरुआत करी ज्यी। कार्यक्रम मांय मुख्यमंत्री जनता ऊं जीवण रो स्वस्थ तरीको अपनावण री अरज कीनी। वे कह्यो के दिनचर्या मांय छोटा-छोटा बदलाव कर र केई बीमारियां ऊं बचाव कर्यो जा सके है।

-----

मुख्यमंत्री कह्यो के स्कूली बच्चां मांय स्वास्थ्य रा बारा मांय जाग जगावण सारु प्राथमिक अर मिडिल स्कूलां रा कोर्स मांय स्वास्थ्य रा विषय जोड़्या जावेला। वे चिकित्सा कर्मचारियां ऊं समर्पित भाव सागे मरीजां री सेवा करण री अपील कीनी। ई मौके चिकित्सा मंत्री गजेन्द्र सिंह खींवसर कह्यो के स्वास्थ्य रो ध्यान राखणो सगळा री प्राथमिकता व्हेवणी चाहिजे।

-----

विश्व स्वास्थ्य दिवस रे मौके प्रदेश मांय ई केई कार्यक्रम राखी ज्या। झुंझुनूं जिला रा चिड़ावा मांय डॉक्टरां रो मान करी ज्यो। पाली रा सरकारी बांगड़ अस्पताल मांय जागरुकता संगोष्ठी राखी ज्यी। बाड़मेर जिला रा आगोर मांय स्कूली विद्यार्थियां ने स्वास्थ्य री देखभाल सारु चोखी आदतां अपनावण री शपथ दिरायी ज्यी। सवाईमाधोपुर रा सरकारी सफाखाना मांय मुफ्त स्वास्थ्य जांच रो शिविर लगायी ज्यो। विश्व स्वास्थ्य दिवस रे मौके प्रधानमंत्री नरेंद्र मोदी स्वस्थ दुनिया बनावण सारु संकल्प जतायो। श्री मोदी वां रा संदेश मांय कह्यो के चोखो स्वास्थ्य हर सम्पन्न समाज री नींव है।

-----

काल महिला अर बाल विकास मंत्रालय री ओर ऊं सातवों राष्ट्रीय पोषण पखवाड़ो सुरू कर्यो जावेला। कुपोषण ने दूर करण रा मकसद ऊं मनायो जावण वाळो ओ पखवाड़ो 22 अप्रैल ताई चालेला। ई दौरान बच्चां अर महिलावां ने पोषण रा प्रति जागरुक कर्या जावेला। ई साल पोषण पखवाड़ा रा तैत खास तौर ऊं चार मुद्दां, जिन्दगी रा पहला एक हजार दिनां माथे ध्यान देवणो, पोषण ट्रैकर रा लाभार्थी मॉड्यूल ने जनता मांय प्रिय बणावणो, कुपोषण रो प्रबंधन अर बच्चां मांय मोटापो दूर करण सारू स्वस्थ जीवन शैली माथे ध्यान दियो जावेला। प्रदेश मांय ई काल पोषण पखवाड़ो सुरू कर्यो जावेला। ई सारू समेकित बाल विकास विभाग री ओर ऊं ई तैयारियां करी जा रही है। आईसीडीएस रा निदेशक ओ.पी. बुनकर आकाशवाणी ने बतायो के ई पखवाड़ा रा तहत ई दफा समुदाय आधारित पोषण प्रबंधन माथे जोर दियो जावेला।

-----

केन्द्रीय मंत्री गजेन्द्र सिंह शेखावत आज जोधपुर रा मथुरादास माथुर अस्पताल मांय आंख्या री बीमारियां रा ईलाज रो नुवो वॉर्ड जनता ने सूंप्यो। ई मौके श्री शेखावत एक समाज सेवी पिरवार कानी ऊं ओ वार्ड बणावण री सराहवणा करता थकां कह्यो के स्वस्थ भारत रो सपनो सांचो करण सारू सरकार लगातर काम कर रही है।

-----

पशुपालन मंत्री जोराराम कुमावत कह्यो है के राज्य मांय लारला कांग्रेस राज मांय गौशालावां मांय व्ही गड़बड़ियां री जांच करी ज्यी है, ज्यीं पाछे जैसलमेर मांय 38 गौशालावां रा लाइसेंस निलम्बित करी ज्यो है। वे आज पाली मांय खबरनवीसां सागे बातचीत कर रह्या हा।

-----

जल संसाधन मंत्री सुरेश सिंह रावत ई आज हनुमानगढ़ जिला रा लखवाली हैड, घग्घर नदी अर डायवर्जन कैनाल रो दौरा कीनो। श्री रावत मुख्यमंत्री भजनलाल शर्मा रा हनुमानगढ़ अर श्रीगंगानगर रा काल प्रस्तावित दौरा री तैयारियां रो ई जायजो लीनो। वे खबरनवीसां सागे बातचीत करता थकां कह्यो के नहर मांय पाणी मांय गन्दो व्हेवण ऊं रोकण सारू पंजाब सरकार अर केंद्र सरकार ने कागद लिखी ज्यो है।

ऊर्जा मंत्री हीरालाल नागर ई आज श्रीगंगानगर मांय विद्युत प्रसारण निगम रा अहलकारां सागे मीटिंग कीनी। वे इंजीनियरां ने मौके पूग र कमियसं दूर करण रा हुकम दीना, ताकि जनता ने उनाळा मांय जरूरी बिजली री पूर्ति करी जा सके।

-----

जनता ने काम-धंधा सारू सस्ता कर्ज मुहैया करावण बाबत साल 2015 मांय चलायी ज्यी प्रधानमंत्री मुद्रा योजना चलायां काल दस साल पूरा व्हे जावेला। ई योजना रा तैत हाल ताई करीब 32 लाख करोड़ रुपया रा 52 करोड़ ऊं बत्ता कर्ज मंजूर करी ज्यो है। योजना रा तहत वित्तीय समावेशन ने आसान अर कारोबारियां ने मजबूत बणावण सारू गैर-कृषि लघु अर सूक्ष्म उद्यमां ने दस लाख रुपया ताई रा बिना जमानत कर्ज दिया जावे है। आं मांय 50 हजार रुपया ताई रा शिशु, पांच लाख रुपया ताई रा किशोर अर दस लाख रुपया ताई रा तरुण ऋण शामिल है।

-----

सरकार पेट्रोल अर डीज़ल माथे एक्साईज ड्यूटी मांय दो रुपया प्रति लीटर री बधोतरी कीनी है। तेल कंपनियां रे मुजब इण ऊं पेट्रोल डीज़ल रा खुदरा मोल मांय बधोतरी नी व्हेला। पेट्रोलियम अर प्राकृतिक गैस मंत्री हरदीप सिंह पुरी आज नई दिल्ली मांय बतायो के उत्पाद शुल्क मांय बधोतरी रो ग्राहकां माथे भार नी पड़ेला। श्री पुरी कह्यो के रसोई गैस री टंकी रा मोल मांय 50 रुपया री बधोतरी करी ज्यी है। व कह्यो के काल ऊं प्रधानमंत्री उज्ज्वला योजना रा तैत गैस री टंकी भरावण वाळां ने साढे पांच सौ रुपया अर दूजां ने 853 रुपया देवणा व्हेला।

-----

प्रदेश मांय केई ठौड़ां अप्रैल महीना रा पहला सप्ताह मांय ई तेज़ गर्मी पड़बा लाग्यी है। बाड़मेर अर जैसलमेर समेत न्यारी-न्यारी ठौड़ां लारला दो-तीन दिन ऊं लू बाज रही है। म्हाणा बाड़मेर खबरनवीस बतायो के वठे उन्नो बायरो बाजण ऊं जिन्दगी माथे असर पड़ रह्यो है।

-----

कोटा, चित्तौड़गढ़ अर जालौर मांय बाज रही गर्म हवा ऊं लोगां ने परेशानी रो सामो करणो पड़ रह्यो है। दिन री बगत धूप री तपिश रे कारण आवाजाही मांय कमी आयी है। झुंझुनू मांय तपन ऊं बचाव सारू भांत-भांत रा जतन कर्या जा रह्या है। मौसम विभाग रे मुजब आवता दो दिन तेज़ गर्मी ऊं साता मिलण रा आसार नी है। दस अप्रैल ऊं प्रदेश मांय कठे-कठे आंधी चालण अर हल्की बिरखा व्हेवण रा आसार है। ई बीचे सवाईमाधोपुर री जनता ने उनाळा मांय पाणी मुहैया करावण सारू शहर रा आठ हलका मांय ट्यूबवेल खोदया जावेला। ई सारू लगभग 99 लाख रुपया मंजूर करी ज्या है।

-----

प्रदेश मांय आज पांचवी कक्षा री बोर्ड री परीक्षा सुरू व्हे गयी। राजस्थान माध्यमिक शिक्षा बोर्ड री ओर ऊं लिया जावण वाळा अ इम्तिहान 17 अप्रैल ताई चालेला। बोर्ड रा सचिव कैलाश चन्द्र शर्मा बतायो के इम्तिहान सारू 13 लाख 58 हजार विद्यार्थी नाम मण्डाया है। वे बतायो के ई सारू 19 हजार 578 परीक्षा केन्द्र बणायी ज्या है।

-----

सुप्रीम कोर्ट आज वक्फ़ संशोधन कानून-2025 री कानूनी वैधता ने चुनौती देवण वाळी अर्जियां री तुरत सुणवाई माथे विचार सारू सहमति जतायी है। मुख्य न्यायाधीश न्यायमूर्ति संजीव खन्ना, न्यायाधीश संजय कुमार अर के.वी. विश्वनाथन री खंडपीठ **जमीयत उलमा-ए-हिंद** रा वकील कपिल सिब्बल री दलीलां माथे गौर कीनो है। ई मुद्दा माथे नामी वकील श्री सिब्बल, अभिषेक सिंघवी अर निजाम पाशा ई मामला ऊं जुड़ी दूजी अर्जियां ने ई तुरत सूचीबद्ध करण रो जिक कीनो।

-----

आईपीएल क्रिकेट होड़ रा तैत आज मुंबई मांय मुंबई इंडियंस अर रॉयल चैलेंजर्स बेंगलुरु बीचे मुकाबलो व्हेला। ओ मुकाबलो वानखेड़े स्टेडियम मांय अब ऊं थोड़ी देर पछे साढे सात बज्यां सुरू व्हेला।

-----

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम **मन की बात** मांय ई महीना 27 अप्रैल ने विचार बतावेला। आ ई कार्यक्रम री 121वीं कड़ी व्हेला। ई सारू आप ई 25 अप्रैल ताई सुझाव भेज सको हो। आप मुफ्त नम्बर **1800-11-7800** डायल कर र राय दे सको हो। **नरेंद्र मोदी एप** या **माय जीओवी ओपन फोरम** रे जरिए ई सुझाव दिया जा सके है।

-----